

# 我係網上面識左個女仔

作者: 煙筒

Powered by [紙言](#)

# 第一章-英雄聯盟

我叫李榮軒，不過除了老師，根本沒有人會這樣叫我，人們都叫我青蛙，因為我英文名叫Frog，自從網上流出一條「say frog」的片之後，我又多左個名，「Fuck」，我成日都想改名，但係好可惜，我改完之後嘢人都係叫我Frog，改黎都冇用。

講番正題，我一直都有玩LOL，有一日放學返到屋企，照舊開電腦打機，配對完之後我拿拿林簡返我隻易大師，但係有條友叫咩「娘娘我愛你」話想用易大師，問我可唔可以比佢用，我份人就好小氣嘅，見到佢個膠名，更加唔想比佢，但係人地咁有禮貌，俾你一次咁多囉，但係除左易大師，我都冇買其他英雄，唯有係免費英度揀啦，我都唔記得我最後用左咩，玩完果場後，正想玩多場，就見到果個「娘娘我愛你」加左我，我就做左一個以家好後悔的決定--accept，accept左之後，佢開始聊我傾計.....

「Hello ~ ~」

「hi」

「我係頭先借左你隻易大師果個啊 ~ :P」

「ik」

「我頭先玩得好唔好呀？ ?XD」

好gay囉，男人老九係咁係度 ~ ~ 鬼咁多表情，仲有，其實你玩得好鬼差，11死仲好意思問人你玩得好唔好，有病！不過基於禮貌我都係口是心非...

「ok la」

「真係架？ ?XD我第一次玩架咋！」

Hi auntie！唔係得我地中路打得好，神早輸向左走向右走左啦！我決定唔理佢，自己玩。

娘娘我愛你：做咩唔理我...;(

娘娘我愛你：咦原來你玩緊！等我觀賽先XDD

娘娘我愛你：哇！你好勁丫 ~ ~

娘娘我愛你：點解你隻易大師犀利過我果隻咁多嘅？ :o

娘娘我愛你：不如你教我玩丫 ^3^

好向左走向右走gay呀！！！！我開始懷疑呢條友到底係咪真係男人...

## 第二章-朋友... ?

「no la」

其實我都係得個4殺，打得唔算好，一黎我覺得我有資格教人，二黎我唔係gay，三黎你實在太煩，就算我carry曬全場都唔想理你。

「點解喎...T—T」

「I'm not gay」

「...」

就係咁，冇下文，我終於可以擺脫呢個變態佬。  
當時我真係咁覺得，但係幾分鐘後...

「唔緊要啦，你唔教我我地都可以做朋友架嘛！:)」

我到底應該點答？朋你老味？唉，都唔知係咪打得飛機多，宜家上天要懲罰我。

「...」

「就咁話架啦！：目」

「...」

「其實你係咪唔識打中文？我可以教你架喎;)」

「no」

「哈哈，你真有趣！」

趣你老味，我突然覺得自己一直覆佢先係問題所在，如果我唔理佢咪得囉！都唔知點解一直都會覆佢咁on9。

...

...

...

佢一直等唔到我回覆，一直無再講野，阿媽我得左啦！

「你係咪怕羞呀？」

我唔會上當架啦，你死心啦。

「你真係怕羞？哈哈！你好得意呀XD，做咩唔覆我？唔洗怕羞喎，姐姐請你食糖糖啊XD哈哈」  
fuck！你真係好絕！我再唔覆你就好似個怕羞仔咁.....

咪住！姐姐？

「you are girl!？」

「梗係啦，我幾時話過你知我係男仔？-3-」

唔向左走向右走係掛？有女仔話同我做朋友！？

## 第三章-Facebook

「but your name...」

「呢個ac我阿哥架，話說你有冇FB？」

「i hv ar」

「太好啦！XD不如你俾你FB我，我地FB傾？我阿哥要用電腦丫！」

比唔比好？我FB又冇乜唔見得人...比就比啦，如果係真我仲可能就咁食到女女，咳咳，我的意思係識到個新朋友，毒向左走向右走最忌有自信！

「李榮軒」

「第一次見你打中文XD 我依家去add你啦，我FB叫Anna Chow丫:)」

然後佢就off左，我個腦就仲停留係有女仔話同我做朋友度...

幾分鐘後，FB有一個交友邀請，「Anna

Chow向你發出一個交友邀請」，我突然係度諗，如果佢係豬扒我咪hihi？我即刻去睇睇佢啲相，點解...得卡通同風景相？唉...死就死啦，「確認」。

「Hello ~ ~」

「hi」

「我係頭先LOL果個丫~」

「ik」

點解啲對話on9得黎又有啲似曾相識？算啦理9得佢！

「哈哈」

其實你笑乜？不過你係女仔，我原諒你。

「haha」

「你笑乜野？.o.」

忍住呀李榮軒！唔好講粗口！

「係呢，你英文名係咩？我係Anna~」

其實佢係咪覺得我智商有問題？

「Frog」

「下？我問緊你英文名呀==做咩講粗口！」

「Frog！」

「唔好玩啦==」

「my name is Frog...」

「下！？你講真架【笑喊】【笑喊】」

我好後悔答左佢...雖然我都俾人笑慣.....

「...」

「哈哈，你果然好得意！XD」

「how bout ur chinese name?」

「我中文名？」

「yes」

「我姓周:)」  
鬼唔知你阿媽係女人！

「name？」  
「Anna」  
我覺得我係比人玩緊...唉，真係唔應該理佢.....

2分鐘後...

「好啦好啦我唔玩啦【笑喊】，唔好唔理我啦！」  
睬你都傻！

1分鐘後...

「我全名叫周穎欣丫...睬下我啦T\_T」  
唉...我又心軟.....

「:)」  
我真係唔知可以覆乜野，唯有覆個哈哈笑。

## 第四章-起底

「講住咁多先啦:) 我要做功課啦...」

「88」

原來功課要做架？

咪住，佢會唔會係小學雞黎架？我有戀童癖架啫...我facebook有圖有真相，有樣睇，大概都估到我幾歲，但我除左知道你叫周穎欣Anna，就乜都唔知，一陣個名都係假嘅，我咪好唔著數？再咁落去唔得！我一定要知你個樣！！

我睇曬佢個Facebook，佢朋友唔多，得80幾個，生活時報唔太多野，我睇到落尾都係用左十分鐘左右，唯一有用嘅就係佢俾人tag要寫個人資料，其他都係換下icon呀封面相片，呢個就係我講果個個人資料：

「1大名: 周穎欣

1生日: 5 / 6

1誰點了你: Karen Cheng

1會做家事嗎: 會呀 ~

1喜歡F.B還是Yahoo: Google:P

1常賣萌嗎: 不會啦 ~

1你怕黑嗎: 怕...

1你脾氣好嗎: 看你是誰 ~

1有喜歡你的人嗎: 不會吧？

1有過暗戀的人嗎: 有啊！XD

1第一次暗戀你幾歲: 忘了：P

1喜歡喝酒嗎: 我不喝酒的 ~

1喜歡的異性敬酒你喝不喝: 我不喝酒的 ~

1喝醉過嗎: 我不喝酒的 ~

1喜歡跟朋友在一塊嗎: 嗯嗯！

1傳卷人是你的什麼人: 好朋友！<3

1你覺得傳卷人怎麼樣: 超級大好人 ~

1如果傳卷人說喜歡你怎麼辦: 我也很喜歡你【心心眼】

1你喜歡吃什麼: 蛋糕

1你文藝嗎: 不【笑喊】

1最受不了怎樣的異性: 沒有哇

1愛睡覺嗎: 看情況~~

1喜歡看電影還是電視劇: 電視劇

1最喜歡什麼顏色: 黃色

1生日禮物想要: 小狗XD

1有心事嗎: 現在沒有 ~

1你獨立嗎: 我很依賴別人的：P

1傳卷人當在你面前哭了你會怎麼辦: 遞紙巾，安慰她:)

1你現在開心嗎: 開心XD

1想對前男 / 女友: /

1你的異性朋友多嗎: 不多

1你會和異性好朋友成為戀人嗎?: 看情況 ~

1填到煩了嗎: 有一點哈哈

### 好了終於結束了 ### 被點人必填 ###(要填啫~~~)

寫完之後請點20個好朋友，想起誰點誰，不可以不點啲

需要題目請-留言我傳給你\你~~~~

我朋友很少...所以不點其他人了~哥哥，就決定是你了！哈哈」

她只點了她的哥哥，果然朋友不多，現在確認了她的名字，接下來看看她哥哥的facebook。

皇天不負有心人，我終於係一張「妹妹買了生日蛋糕給我-覺得被愛」的相入面見到一個女仔，雖然佢阿哥沒有tag她，但從Anna

Chow的留言：「做乜擺我個樣上黎 - 3 - 」中知道左相中人係她，她個樣唔算差，也唔算好，望落有點矮，戴左副黑粗框眼鏡，望落十五六歲左右，有些微胖。

## 第五章-阿爸阿媽

算係咁啦，我呢啲小毒向左走向右走識到女仔已經好唔錯，正係我仲搵緊有冇其他有用嘅相或者其他資料嘅時候，我阿媽返到屋企喇。

「仔呀！」

「咩事呀阿媽？」

「過黎幫我，幫我拎呢幾袋米入廚房啦。」

「哦。」

就係咁，我嘅起底行動就被終止左，冇所謂啦，要嘅都差唔多搵到，其它由佢啦。

「阿媽做乜買咁多米呀？」

「平啊嘛！」

「食唔食得曬架我地.....得兩個人.....」

唔好誤會，我唔係單親家庭長大，只係阿爸要唔知咩Overseas

Training，去左外國，好似好勁咁啦，其實我都唔知咩黎，都成大半年前出發，呢大半年黎佢都有寄下家用俾我地咁，如果唔係靠阿媽得閒打下牌嘅收入，根本生活唔到，何況佢有時仲輸錢添？

「死仔，你老豆下星期返香港啦，係咪連自己有個老豆都唔記得？」

原來係咁，其實我都慣左得我同阿媽兩個人嘅生活，差啲唔記得阿爸係會返黎。（長途太貴，我地好少講，阿爸阿媽又冇facebook，所以都真係冇乜交流）

就係咁，一個禮拜後，我被阿媽帶左去接阿爸機。

「老豆！」「阿爸！」

其實由細到大我都係叫阿爸做阿爸，阿媽就叫阿爸做老豆，Anyway啦。

「老婆，仔！」我阿爸向我地揮揮手。

當行到咁上下，我地終於碰面，冇電視劇嘅擁抱，冇喊，大家只係笑下就一齊行番屋企。我留意到，阿爸嘅樣冇乜變，係衣著方面變化大啲，去個時T-shirt短褲，宜家恤衫牛仔褲。

返屋企嘅途中，阿媽同阿爸都好多計傾，我間中嗯嗯哦哦下，大家好似冇分開過咁。



## 第六章-主動

說起來，自從上次佢話做功課，佢都冇再搵我，直至今日。

琴日接完阿爸機，食完飯，我就返房訓，臨訓就再睇下facebook啦，見到Anna Chow發佈左個近況，話咩去左op，好向左走向右走開心咁上下啦，當然佢冇講粗口，佢仲po左張相，係係海馬公園門口影嘅，冇佢個樣，得啲路人甲乙丙。

跟住就係今日喇，以下係我地今日嘅對話：

「喂~Frog~~」

「乜事」

「好耐冇同你講野-3-話時話點解你用中文嘅？XD」

「有乜問題」

「你平時成日都只係講英文-3-」

「平時用電腦打英文快」

「你依家用電話？」

「55」

「咩係55？」

「嗯嗯==」

「????？」

「55=嗯嗯，表示同意」

「哦~~但點解用電話就會打中文嘅？」

「鍵盤細 英文唔方便」

「哦~~」

「做乜無啦啦搵我」

「掛住你^3^」

「死開」

「有冇搞錯TAT嗚.....」

「哈哈」

「仲笑><」

「唔玩啦」

跟住佢就冇再講野，但其實我有少少在意果句掛住我。

過左2日，大家都冇咩聲氣，我放學打LOL果陣，竟然比我見到佢戰鬥中，雖然唔知係佢定佢阿哥，但我相信一觀戰就可以估到，因為佢個ac都有五十幾勝場，唔多，但係一個好似Anna嘅新手一定玩唔到，可以推斷佢阿哥技術好過佢好多，我觀戰果陣，見到「娘娘我愛你」用緊阿璃，死左6次，宜家等緊復活，我就知道，呢個一定係Anna。

我冇再觀戰，反正再落去都冇野睇，估都估到「娘娘我愛你」會繼續送人頭，我打算自己玩翻場，玩之前，我send左個msg比娘娘我愛你：Hi。

我玩到一半果陣，娘娘我愛你send左個msg比我：

「點解hi完我又唔理我\3/」

「when did you feed back me?」

「我同你講左好多野！！」

「i didnt receive any msg」

「哼！唔理你！！有冇搞錯！！！」

「have you typed /r before writing?」

「乜/r呀！」

「talk to you later」

睇黎呢個「可愛」嘅新手，連玩緊同人講野要加/r都唔知.....但係我宜家推到二塔，唔得閒應酬佢。

## 第七章-有女仔date我呀！

玩完果場之後，我用左半個鐘去解釋LOL係玩緊果陣點解要加/r先可以同我講野，跟住佢先話原諒我，雖然我唔覺得我有錯。

跟住我地都有再講野，佢有佢打LOL，我就溫書，雖然我話功課唔洗做，但書就不得不溫，因為要測驗考試，唉，聽日有三科要測。

如是者到左第日，我測完驗一返到屋企，手機就收到個facebook msg (我平日唔會係街開數據，返到屋企先有WiFi)。

「想唔想知我咩樣：P」  
我第一時間想覆話我已經知，不過都係收左手，費事搞到我好似變態咁，去起人底，我開左電腦，開始同佢對話。

「no」  
「.....」  
「why you ask that?」  
「我想約你出黎.....」  
「! ?」

我第一個反應係：唔向左走向右走係掛! ? WTF! ? 仲差啲係張凳跌左落黎.....有女仔約我呀！

「點呀...肯唔肯啊-3-」  
「why suddenly want to date me?」  
「肯唔肯啊?」  
係咪有陰謀架.....以我所知我應該無咁大吸引力架啫.....

「you tell me why first」  
都係保險啲好.....

「係咪我講左你唔會笑我同應承出黎??」  
「say first」  
「答左先!」  
「ok」  
然後佢輸入中左好耐.....

「我同班朋友玩真心話大冒險，轉中我果時，我一時貪玩，簡左大冒險，然後佢地要我同學校訓導老師(男人黎)表白，我緊係唔制啦，口快快話我有男朋友.....跟住大冒險內容就變左要帶男朋友俾佢地睇.....我圈子好細架咋...根本冇乜邊個男性朋友，佢地又見過我阿哥，所以我先想搵你幫幫手!! PLS! 日期就係今個星期六，你著得靚靚仔仔，下午3點係旺角地鐵站出現就得架啦! ><THX!! ^3^」

就係咁，我將會係星期六見到佢真人。

## 第八章-見面

星期六話咁快就到，呢幾日我地都有傾下計嘅，都係講下LOL咁.....

我十二點鐘就起左身，為今日嘅見面做準備，話曬第一次見，留個好印象好重要架嘛。

首先要刷牙洗臉，刷牙要刷得乾淨啲，我刷左兩次，洗臉要洗得乾淨啲，我偷偷用左阿媽啲洗臉奶，然後順便gel

gel個頭。跟住係著衫，格仔恤衫配牛仔褲就夠普通得黎又不失帥氣，雖然我都知我係唔會著得「帥氣」.....更加重要嘅係其實我冇恤衫，除左校服。T-shirt牛仔褲都得嘅，我見得人嘅上衣就得幾件，灰色淨色加logo，深藍色底米奇老鼠公仔，白色底海賊王公仔有帽，校服，但係其實件件都唔係太ok，最後，我著左淨色，加外套遮住佢。外套方面，我揀左件黑色風褸，鞋方面就普通波鞋，最後係袋，咩背囊好似怪怪地，都係斜咩袋啦。

形象終於搞掂，其實都搞左成個幾鐘，然後就先食野填填肚。

樓下有大家樂大快活M記同茶記，理所當然我去做最有人情味嘅茶記。

今日唔食豆腐火腩飯，「老細A餐凍檸茶少甜！」。

然後就係返屋企等。

期間Anna都有搵我。

「Frog~~」

「？」

「你記得今日要出黎個何??」

「sure la」

「其實我有少少期待見到你真人XD」

我唔止少少添，我第一次俾女仔約呀！好向左走向右走緊張添！

「me2 haha」

「:)」

然後我就呆等到兩點幾，然後出發，早到都係好重要。

終於，14:40我就到左，我開左數據，同Anna溝通。

「我到左啦」

「咁早!?我仲未出門口【笑喊】」

「你班朋友到左未?到左你話我知」

「未呀」

14:45。

「Frog!!不如你比你whatsapp我?我手機冇facebook，出左門就搵唔到你！」

比唔比好？又係呢條問題，唉，同一條問題答案都只得一個，我思考左陣就答佢。

「6×××1×××」

「我係9×××7×××呀:)」

跟住電話就響起，9×××7×××傳信息給我，「我係Anna呀~hi~~?」

我即刻set番個聯絡人名，就同佢Whatsapp，依家係14:48。

「Hi~你依家係邊？」

「就到啦！！我著粉紅色T-shirt藍色短褲~~」

「我著黑色風褸牛仔褲」

「我見到你啦~~?」

我抬頭，望下左邊，見唔到，右邊，都見唔到，下面，Anna話「玩你咋XD我未到，就快到~」  
Hi!

14:51。

佢到左，我睇過佢張相，認得佢個樣，但佢唔係著粉紅色衫藍色褲，而係藍色T-shirt粉紅色短裙，其實...都幾可愛，不過，想fake我？我fake翻你！我入左男廁，係角位可以望到佢。

whatsapp:

「又話到左??人呢!!!?」

「係你後面呀」

佢真係望左去後面。

「你唔係以為我會上當丫嘛??」

事實係你上左當，加上你回頭呢個動作，我已經肯定你係Anna。然後佢咁啱望住另一面，睇唔到我，我就走左去佢後面。

「你再望下啦，我真係係你後面」

「我唔會再上當!!」

「你認左你頭先上當啦？」

呢句唔係係whatsapp send嘅msg，係我企起佢後面係佢耳邊講嘅。

佢梗係俾我嚇親啦，佢一拎轉頭，我地四目相投，呢次，係我地第一次面對面。

## 第九章-做戲

「點...點點解你會搵到我架？明明我同你講話我著粉紅色衫藍色褲架！」  
呢個時候，我見到有班女仔行緊過黎，應該係Anna班朋友。

「傻豬！我係你男朋友黎架嘛，果小小伎倆就想呃我？」  
我覺得我可以拿視帝。

「咩...咩呀你係扮...」  
「shu.....」我用食指按住佢個嘴。  
「你班朋友，好似到左。」  
佢真人真係好得意，搞到我唔知點解一見到佢就想扮情聖，好似好型咁，明明我內裡係一個小毒向左走向右走。

「我地係咪阻住左你地呀？」  
佢班朋友一路講一路笑。

「咩咩...咩呀...」  
佢塊臉紅到咩咁。

「喂，你係咪羊黎架？咩咩~」  
我一路笑佢一路扮佢。

「咩...咩...咩呀！我係人黎架！」  
佢好似翩翩地咁，哈哈。

「仲話唔係？」  
我真係笑左出黎，佢真係好得意，明明只係一個唔太熟嘅網友，但係會令人忍唔住玩下佢。

「喂喂喂！唔好再耍花槍啦！好曬呀！」  
佢班朋友繼續笑。

到底點解，佢真人同網上差咁遠？佢...真係好得意，我越黎越覺得自己有少少鍾意左佢.....

不過我知道，我地之間就只係一場戲，之後面前呢個可愛嘅女仔就會變返網上面嘅Anna，我都唔知佢有咩吸引，不過一見到佢真人，就即刻.....鍾意左佢，呢啲係一見鍾情？定由一開始我已經慢慢鍾意左佢，見到真人個感覺先強烈啲？我唔知，但我知道，我要做好呢場戲，享受呢段做佢男朋友嘅時光。

## 第十章-情侶

「行啦我地！」

Anna其中一個朋友捉住我隻手拉走左我。

「喂.....」

我同Anna同時間覺得好無奈。

半拉半扯間我地到左一個公園，然後我同Anna比人「擺」左係一張長凳度。

「我地去廁所先，你地自便啦～」

佢班朋友一齊「去廁所」，之前拉走我果個女仔仲單矚眼咁.....

「Er.....我地點？」

「佢地應該係匿埋一二邊睇我地.....所以.....我覺得我地...應該...扮下情侶.....」  
你咁講姐係咩意思！？見你臉都紅曬，你到底諗左去邊。

跟住我見到，佢班朋友真係係度偷睇我地，匿埋係啲樹後面。

「哇！」

Anna無啦啦攬住我，我當堂嚇一嚇，乜依家啲女仔咁主動架？  
我都知佢要做戲比佢班朋友睇，我唯有配合下啦。

「喀嚟」

F×××！

佢班朋友起遠處影左我地相！仲要唔記得刪聲.....

Anna即刻彈翻開，佢班朋友都行返出黎。

「喂喂喂...唔洗怕羞個破，繼續都ok架破，我地唔介意架～我地都準備左黑超架啦！」  
佢地又一路笑一路講野，之後仲成班友一人一副太陽眼鏡。

「玩唔玩True or Dare？」

其中一個女仔問。

無人冇異議，所以我地就玩True or Dare啦。

第一個轉中嘅係一個叫Judy嘅女仔，佢揀左True。

「Judy你係男定女？」

！？

「女～」

之後再轉，到我，我揀左Dare。

「Anna男朋友，你宜家即刻咀啖Anna啦！」

Hi！

Anna塊面又紅曬。

「你地拍緊拖架啲，唔係咀啖都唔得下嘛。」「咀啦~」「咀佢咀佢！」  
群情洶湧，我唯有順下民意，係咁意錫左Anna塊臉一下，佢真係紅過紅蘋果.....

「臉咋.....我要嘴喎！」

「你都有講~」

「切~」

禍不單行，下一個轉中Anna，佢都揀左Dare。

「Anna你.....諗下先.....」

佢地諗左一陣，終於有結果，不過諗咁耐，唔方好野。

「同你男朋友嘴對嘴錫10秒，唔準分開！」

哇！！

哇！！！！

哇！！！！！！！！！！

「下！？」Anna又紅。

結果當然係要照做。

之後只係再轉中過Anna一次，就有再中我地兩個，果次Anna揀左True，佢地問我地點識，其實都有乜野，Anna答話補習班，是但啦，幾合理，其他人嘅問題或冒險都好簡單，明顯係玩我地，fine。

然後今日就有再玩其他，佢地個個話有野做要走先，最後剩低我地兩個，我地都走埋，我有送佢，始終唔係真係男朋友。

今日真係好開心。



## 第十一章-反思

返到屋企之後，有一陣失落感一湧而上，我在想，我是不是瘋了？

果個只係個網上聊過幾次嘅女仔，我就無啦啦應承佢出街。

出街可能仲冇問題，網友見面可能好平常。

但係我地第一次見面就扮情侶，其實好多野都好過火。

雖然唔係初吻，但係都係幾close嘅身體接觸，幾年冇錫過女仔.....就咁俾左個網友。會唔會.....急左啲？

「Anna Chow傳信息給你」

「今日.....sorry」

要唔要覆佢.....？

...

...

...

「我啲朋友會唔會太過份？o\_O」

「你應該洩底過我」

平常心呀！

「.....」

「冇野嘢放心啦」

「其實.....我地之間.....」 「你到底當我係咩??」

下! ? 女人真係麻煩嘅生物，問埋曬啲我都唔識答嘅問題.....同我想埋差唔多嘅野.....唉.....

「朋友掛」

「喔.....」

「:)」

我到底當佢係咩？

呢排.....都係唔好搵佢住，或者我地需要冷靜下。

## 第十二章-Rummy

兩個禮拜就咁過左，我間中都會見到佢on  
LOL，佢亦有時有like我Facebook嘅post，不過大家都有共識，冇搵對方。

過左兩個禮拜，我以為我對佢果種矛盾嘅感覺已經冇左，果種鍾意左個陌生人感覺。

「+852 9×××2×××傳信息給你」

「同Anna鬧交？」

我第一個反應係：咩料呀！？

然後我就發現唔對路，點解會問個咁嘅問題？

「？」

「我係Rummy，上次有黎架！」

「oic」

Rummy，我記得佢係上次咁多個女仔入面最有女神feel

嘅一個，長頭髮馬尾，髮色有少少啡，俾人感覺好陽光，不過聽佢地傾計，佢好似有男友。（諗緊呢  
啲嘅時候我已經加左佢whatsapp）

「你仲未答我，係咪同Anna鬧交！」

「唔係...」

「真？」

「真，做咩咁問」

「你估我點解有你電話？」

噢，係喎，點解佢會有我電話架？Anna比佢？但係Anna點解會無啦啦比佢？

「Anna比你？」

「唔係，某程度上都算係」

「即係...？」

「我自己係佢電話搵。」

「.....」

「我見到你地兩個禮拜冇wts！你地發生咩事呀？我可以幫到你架！講比我聽啦！:)」  
其實我都唔知點答佢，唉.....

「都話冇野」

「信我啦！」

「我地平時用facebook傾計嘛」

嗯，呢個答法完美！

「原來係咁.....」

正當我打算可以唔再理呢個Rummy時。

「你騙人！」

「？」

「我頭先入左Anna facebook，你地根本冇講野！」

睇到佢facebook對話就知我地係扮架啦，咁講姐係冇睇啦。

「明明有」

「信你」

「點解要扮入去Anna fb？」

「因為唔信你，你知唔知Anna呢排好怪，自從果次之後佢成日神不守舍，又成日望住部電話好似等人覆咁」

Anna佢怪怪地？會唔會關我事？

無論如何我點都要搵佢，無可能就此唔再聯絡，宜家.....係適當的時機？

## 第十三章-這是表白？

「hi」

佢上線，已讀，然後又off。  
過左十五分鐘，我忍唔住。

「做咩已讀不回」

再過左三分鐘。

「hi」

佢終於覆。

「聽你個朋友講，你呢排怪怪地，係咪發生左啲咩事？」  
五分鐘過去了。

「冇...」

「講啦」

「.....呢排肥左咋嘛.....」

會唔會咁簡單呀？連你自己啲朋友都睇得出你唔妥啲.....

「真？」

「嗯.....」

「真？」

「真架」

「你講真話啦」

「.....」

「講真話」

dead air。

「講啦好嗎」

十分鐘。

「我...好似鍾意左你.....」

...

.....

.....

.....

.....

跟住到我dead air。

...

.....

.....

.....

.....

「sorry」

唔係我拒絕Anna呀！呢句佢send架！但係點解要道歉？:o)

「點解要say sorry」

「...你唔介意？」

「介意咩？」

一分鐘後。

「我鍾意你」

「點解要介意？」

「我以為你...」

「其實.....」

其實...我好似都鍾意左你，我講唔出口。

「其實...？」

「我唔介意...」

「喔.....」

「話時話，你小心啲你啲朋友會睇你電話」

「？」

「你個朋友係你電話搵到我電話」

「下.....」

「較番個密碼smiley」

「唔該曬smiley」

呢兩個哈哈笑，有邊個打果時，真係笑緊？

## 第十四章-家變

呢晚，我訓得唔太好。

我深深體會到咩叫一波未平一波又起。

我仲煩緊Anna單野，屋企又發生大單野。

「咁！」

清脆的巴掌聲。

將我由同Anna之間嘅點點滴滴中拉回現實，我暫時將同Anna撲塑迷離嘅關係放低，睇下發生咩事。

「我做錯左啲咩呀.....」

阿媽臉上有片清楚嘅紅印，佢坐左係沙發，喊緊。

「Bang！」

阿爸大大力刪門，我依稀見到，佢拉住個噏。

「阿仔.....你老豆唔會再返黎啦！」

我望緊道門時，阿媽發現左我。

「阿媽.....發生咩事呀.....？」

其實我都估到9成係阿爸掉低阿媽。

「你老豆...佢...有第二個女人...唔要我地啦.....」

阿媽一邊抽泣一邊講。

我安慰左阿媽一陣，然後返左房，阿爸，你咁做一定有你原因嘅.....係咪？

我唔想去信阿爸走左去，但又信唔到佢有苦衷.....

成晚係度煩呢兩樣野，所以訓得唔太好。

鬧鐘響起，我無力地熄左佢，拖住沉重嘅身子，起身刷牙洗臉，今日要返學。

返到學校，平時少聽書嘅我精神更加散渙，咩都聽唔入耳，Anna.....阿爸.....阿媽.....

「李榮軒同學，請回答呢條問題。」

ship！

「.....唔好意思，可唔可以問多次.....？」

「揭開你本書第六十三頁先啦同學。」

「喔.....」

「請問作者想藉本文帶出咩主旨？」

當然我答唔出，老師都只係罰左我企，中文老師都算好人，不過英文堂就無咁好彩，我一樣被老師叫左起身答問題，我一樣答唔到，加上上堂唔專心，我放左學要留堂。

「李同學，可唔可以解釋下點解上堂發夢？」

「對唔住老師.....」

「我唔係要罰你，只係想了解下你咩事姐。」

英文老師其實係輔導組老師。

「無野.....」

「如果你唔講我就要打比你家長傾傾你學習態度嘅問題啦。」

好老土不過.....橋唔怕舊最緊要受。

「唔好打俾我阿媽.....」

「咁你到底發生左咩事？」

「阿爸...琴日掉低左我地兩母子.....」

「噢.....Are you okay?...」

「我想返屋企睇睇我阿媽。」

「如果需要幫手記得搵我，你返去先啦。」

老師再附上一個親切嘅笑容，老師，多謝你。

翻到屋企望住阿媽，佢一日殘過一日。

每日翻學唔知聽咩，翻到屋企望住阿媽好殘嘅樣，佢.....都好耐冇笑過啦.....

最衰都係阿爸.....搞到阿媽咁辛苦.....

有日我返到去，見到阿媽訓左係沙發，心都安樂啲，佢好似好耐冇教好訓啦。

Anna嘅事，都係遲啲先諗啦.....

## 第十五章-阿媽！

太叻嘅關係，我見到阿媽訓左係沙發就翻左房訓。

第二朝，我.....

我起身，去洗臉刷牙，經過沙發時，先發現，阿媽，嘔白泡.....

我呆左一呆，再見到沙發附近有樽無左一半嘅安眠藥。

我立刻意識到阿媽服藥自殺，心裡仲未接受到，身體已經走左去call白車。

呢一切，太意外。

醫務員話，阿媽應該琴晚已經.....死左。

阿媽.....點解...要咁傻...？

點解...要留低我一個？

呢一刻，我個腦一片空白。

阿爸走左，阿媽死左。

我.....真係崩潰喇.....

「呀！！！！！！！！」

「細路，你冇事啊嘛？」

醫務員問我，因為我無啦啦大叫，但其實，我都係想發洩下姐。

「比我冷靜下得架啦」

我吐出呢一句說話，就翻翻房，訓過。

或者一覺訓醒，會發現呢一切只係一場夢呢？

「從不喜歡孤單一個 可惜偏偏孤獨一個 我不懂得跟我獨自對坐 做人沒有你原來相當痛楚.....」  
妖！好嘈呀！邊向左走向右走個打黎呀！

我被電話鈴聲嘈醒左。

醒左之後，第一時間出廳，望下我阿爸阿媽係咪係度。

結果.....客廳空無一人。

「阿媽你係咪係房呀？」

阿媽間房冇人。

「你係咪係廁所呀？」



我敲左敲廁所門。

「我開門架啦。」

廁所有人。

「可能去左買送！」

等下，阿媽就會返架啦！

「從不喜歡……」

電話再響，我即刻聽左。

「請問係咪李榮軒同學呀？」

問者聽落好著急。

「我係呀。」

「我係教英文個Ms

Lam，你無事丫嘛？今日做咩唔返學又唔通知學校？學校收到消息你媽媽……出左事啫……」

原來……一切也不是夢。

我手一鬆，電話伴隨我個心，跌左落地。

我將跌左的電話執翻。

「喂喂？榮軒？喂？……」

「老師……」

「你無事丫嘛，學校果邊我幫你處理啦，你需唔需要輔導下？你……」

「唔洗啦唔該老師。」

我收左老師線。

今日開始，我變左孤兒仔！一家三口嘅幸福家庭正式宣佈破碎，哈哈。

## 第十六章-傾訴？

琴日知道阿媽死左之後，我無做傻事，只係渾渾噩噩咁過，今朝醒翻，靈魂唔知去左邊，我個身就好似返左學校。

「哈哈.....哈哈.....哈.....」

「哇！你做咩呀？笑到傻左咁？」

坐前面個陸仔，另轉頭望住我打算開口繼續問果時.....

「哇！青蛙仔你做咩呀？」

佢見到我面上果兩條淚痕。

「Cedric, please don't talk. Frog, come to see me after the lesson.」

Cedric係陸仔個英文名。

英文堂完左之後我比Ms Lam帶左去間空房。

跟住俾Ms Lam開導左半個鐘，我都冷靜左少少，跟住我返返去上堂，Ms Lam有提議我如果唔想搵老師可以搵朋友傾訴。

返到屋企之後，望住空無一人嘅屋企，真係好難受。

我返返入房，攤係張床度，望住個天花板。

搵朋友傾訴嗎.....？

我打開電話，望住自己Friend List。

「喂？豪哥？」

「青蛙仔我依家唔得閒 - 啞 - 」

「你所打嘅電話暫時未能接通.....」

「Jack.....」

「Frog哥我打緊機呀 - 啞 - 」

「喂？陸仔？」

「咩事呀青蛙仔？」

「想搵你傾下計呀.....」

「遲啲先啦好無？唔好意思呀 - 啞 - 」

「你所打嘅電話.....」

「康仔.....」

「Fuck哥點呀」

「康仔.....可唔可以同我傾下？」

「得」

「我呢.....」

「我就黎復活啦，最多傾十秒，有野就講有屁就放。」

「..... - 啱 - 」

「貓哥.....」

「打錯啦 - 啱 - 」

「電話正在使用中.....」

我都係想傾下計姐.....

我正想打開whatsapp，打算去班群搵人傾下計，我唔信我一個人都搵唔到.....一定有人肯聽我傾訴嘅.....

一打開Whatsapp，見到Anna個名.....或者.....我可以搵佢傾下.....？

我打左比Anna。

「喂.....？」

「Anna.....」

「Frog?你搵我做咩？」

「可唔可以...陪下我傾計...？」

「下.....可...可以呀」

## 第十七章-傾訴

「我好想喊，好想死.....」

「做...做咩呀？唔好睇唔開呀！有咩事，我都會係度，你即管同我講啦.....」

「我老豆去左搵第個女人，掉低左我同阿媽.....」

「下.....你老豆咁衰.....？」

「嗯.....」

「唔好再諗啦.....佢可能有佢理由呢.....？真係咁衰嘅話，都唔值得你為佢咁唔開心啦.....？」

「嗯.....」

「你仲要照顧你媽媽嘛，快啲企番起身呀！佢一個女人未必撐得住.....」

「.....」

「加油呀！」

「我.....阿媽.....」

「係呀！你媽媽一家應該好需要人陪架！」

「哈.....」

「做...咩？」

「阿媽佢琴日.....自殺，死左啦！」

「.....」

對...對唔住.....」

「我應該點.....我可以點.....？」

「.....撐落去呀！.....」

「如果.....我當初好好安慰阿媽.....或者佢就唔洗死.....」

「Frog.....」

「都係我唔好.....」

「唔係你既錯呀.....」

「一日都係我.....」

「唔係呀.....」

「我應該為阿媽既死負上責任.....」

「Frog.....唔係你既責任黎架.....」

Dead air。

「Frog.....」

「我應該點」

「我答你唔到，不過你要盡快企翻起身呀！」

「Anna.....」

「嗯？」

「多謝你。」

「.....唔洗.....，你要記住，當全世界離你而去，都仲有我！」

「嗯」

「加油.....撐落去...！」

「嗯」

你會陪我.....嗎？

「Anna.....」

「嗯？」

「唔需要擔心我」

「.....加油啦！」

「其實.....」

「其實咩...？」

我好想你做我女朋友。

好想你繼續陪係我身邊。

好想你繼續支持住我。

「可唔可以.....」

「可以！」

「下.....我咩都未問過.....」

「你要求既，我一定應承。」

欸嗟，Anna.....你真係可愛:)

憑咩信得過我？

「做我女朋友。」

## 第十八章-身後事(1)

有左Anna呢個心靈支柱，我相信我會捱到落去嘅！

我要重新振作起黎。

我坐番起身，阿爸走左阿媽死左，最大既問題應該係.....

我應該住邊？

然後就係阿媽既喪禮.....

我應該搵親戚幫手...但係我根本無親戚電話.....

拿起電話，或者我應該問Ms Lam幫幫手。

「喂？Ms Lam？」

「Frog？你問我係有咩事呀？」

「唔洗咁驚.....我想問下你會唔會有我其他親戚電話？」

「應該無啱.....」

「依家阿爸走左阿媽死左，我應該去邊住？我無親戚電話.....同埋遲啲都要搞喪禮既事.....」

「喔.....你搵下你媽媽電話？」

咦 係啱.....

「唔該老師，我有事要幫忙再搵你啦。」

「好啊，見到你咁快振作我真係放心囉！」

我拎起阿媽電話，係聯絡人度搵到姨媽電話。

「喂？妹？」

「姨媽，我係阿軒呀。」

「阿軒呀？咩事呀？」

「Um.....阿爸呢.....有啲事走左，阿媽呢.....阿媽佢.....自殺.....死左.....」

「阿軒，有啲.....有啲野唔可以亂玩架.....野可以亂食 說話唔可以亂講架」

「我講真架.....所以想問下搵下有無人可以收留我.....」

「阿軒.....叫你阿媽聽電話！」

「姨媽...都話.....」

「 - 啱 - 」

.....

「人漸醉了夜.....」

阿媽電話響起，我望望，係姨媽打黎。

「喂？」

無人應我.....

「喂喂.....」

「阿軒，你阿媽...真係死左？」

「...恩.....」

「你黎我度住住先啦.....」

就係咁，我去左住旺角嘅姨媽屋企住。

## 第十九章-身後事(2)

之後搬屋呀死亡證呀果啲姨媽都幫我搞掂囉，學校果邊就Ms Lam幫我，終於搞掂囉呢啲。

跟住.....就係阿媽喪禮。

好多野都係姨媽幫手搞，我就負責幫阿媽搵返件靚衫搞下遺物果啲。

返返去屋企，又一陣莫名既悲傷。

話左要振作架嘛！

我望住屋企一草一木，強忍悲傷，去執拾阿媽既野。

阿媽既野.....好快就告一段落。

唔好話我不孝，只係唔想多提，阿媽既野就唔再講啦。

喪禮既日子.....已經到左。

一切正常，不少親戚朋友都有安慰下我咁，不過，我估都估唔到.....

佢會黎

佢真係黎左.....

佢.....姐係我阿爸。

不過佢一黎就比姨媽趕走左。

阿爸.....？點解你會黎？

掉低阿媽同我，一走了之，害死阿媽既人，點解會黎？

之後姨媽都幫阿媽整左個靈位果啲。

大家拜完阿媽，走曬果時，我自己一個留低左，想陪多阿媽一陣.....

期間我人有三急，去左洗手間，返黎果時，又見到佢。

「對唔住.....係我害死你.....你會原諒我嗎？」

「唔會。」

阿爸驚訝咁拎轉頭。

「點解要咁做？點解要掉低我地？點解要害死阿媽？點解仲要返來？點解？」

阿爸睜大雙眼望住我。



「你地...唔係...已經走左啦咩.....？」

「我想陪多阿媽一陣姐」

阿爸突然垂低頭，講左句「對唔住.....」然後轉頭走左去。

我見到.....佢雙眼.....眼泛淚光.....

阿爸.....你係咪有咩苦衷.....？

## 第二十章-戀情(1)

呢段日子，Anna一直都有係我身邊鼓勵我，我地既關係亦係果日變成男女朋友。

一切都好似好正常。

我以為我既生活會就咁落去：  
繼續維持呢段戀情，係姨媽屋企住。

但睇黎一段戀情點都要遇上波折，偏偏係我地呢段戀情剛萌芽，打算茁壯成長時遇上。

大家記得Rummy嗎？就是前幾章的那個Rummy。

我講過佢好似有男朋友，而且好有女神feel吧，記住呢點，再睇落去。

就係喪禮之後果日，佢whatsapp左我。

「你有冇搞錯呀！」

「？」

「你叫Anna改密碼！？」

「有咩問題...？」

「？」

「你偷睇本來就唔啱」

「哼！為左補償我既損失，你聽日5點鐘黎xxx學校門口等我！」

「下？點解？」

跟住佢就off左。

衰就衰在我真係應約。

「Rummy！」

「估唔到你真係黎左」

.....

唔係你叫我黎既咩.....

佢跟住無啦啦橋住我。

「喂！你做咩？」

我即刻想縮開，但佢橋得好實。

呢個時候一個男仔行緊過黎。

「黃秀蘭！你做咩呀！」

佢大喊，黃秀蘭正正就係Rummy個名。

跟住Rummy放開左我，同個男仔嗌交。

我大概了解到，Rummy係想借我過橋，激佢男朋友。



「咩呀！我早兩日hack到入Anna  
facebook，睇曬你地啲野啦！仲扮野，你地對假情侶！我同阿輝係真感情黎架！我真係好需要你幫  
手架.....」  
如果再解釋比Rummy聽，真係趕唔切追上Anna，但係.....唉...！

「喂！」  
我無視Rummy既叫喊，撇下佢隻手，跑番學校方向。

Anna，你唔好誤會呀！

Anna，你要信我呀！

Anna！

返到去學校，冇Anna嘅蹤影，等緊我嘅只有一個男仔。  
呀唔係，係一個拳頭。

Rummy男友，姐係阿輝，怒氣沖沖咁衝過黎打我，雙眼佈滿血絲。

佢一拳就將我打落地。

「賤人！」  
佢準備再揮拳。

「搶我條女，仲要一腳搭兩船！」

## 第二十二章-戀情(3)

「大大大佬.....唔唔唔係呀！」  
係我吐出呢句時，拳頭亦衝左過黎。

「仲唔向左走向右走認！賤人！」  
「你聽我講先！唔好打住！！」  
估唔到呢句真係令下一個將至既拳頭停低，就好似差佬叫個賊唔好走，個賊真係停左係度咁。

「講啦！」  
「Rummy借我過橋咋，佢想激你咋！Anna真係我女友，我趕住去解釋呀！仲有呀，Rummy好緊張同你呢段感情，你就對佢好的啲啦，鬧咩交姐！」

跟住我就霸氣咁企番起身，掉低呆住既阿輝，去追Anna。

跟住我追到佢，同佢解釋清楚，再加多句我愛你，佢聽完好感動，攞住左我，再講句我都愛你。

如果件事有咁浪漫咁成功就好。

事實係，我搵極都搵唔到Anna，完全唔知佢走左去邊。

最後我死死氣翻翻屋企。

翻到去，電話又再響起，我有2個whatsapp。

Anna

「你唔好搵我住。」  
「Anna.....你聽我解釋啦！」  
一個tick，而且我睇唔到佢上線時間呀status果啲.....我估佢block左我。  
算啦.....遲啲搵機會再解釋.....反正宜家講咩佢都唔會聽得入耳.....

Rummy

「賤人！」  
「又點呀小姐」  
「為左Anna丟低我，仲同阿輝講埋你係假冒！Anna只係你假女友黎架咋！」  
「同你講都晒氣，我講多次，Anna係我女友，真嘅女友！」  
「唔洗再死撐啦！都話我hack左Anna FB！」  
「唔好懶叻啦！果啲係之前嘅事，宜家我地係真情侶，但因為你條八婆宜家Anna誤會曬，仲block埋我呀！」  
跟住佢就無聲出，費事傷人，我嬲到喊果時打出既八婆比我係send之前del左。

## 第二十三章-戀情(4)

第二日，我番學果陣仲諗緊點氹翻Anna，其他老師唔覺，但特別關注我既Ms Lam就發現左，所以我又要留堂。

放學了。

「好翻啲未呀？」

「我已經無野啦.....」

「咁點解頭先上堂又神不守舍咁？」

唔通答你我激親個女仔咩.....

情急之下，阿爸講對唔住個畫面又係腦中浮現。

「我之前見到阿爸拜阿媽.....」

「哦.....咁可能佢真係有原因先走左去呢？咁探你媽媽都無錯既，唔好諗太多啦」

「哦.....」

跟住我就可以返屋企。

返到屋企樓下.....我見到兩個人.....

一個係Anna，我真係好想衝過去捉住佢解釋，求佢原諒。

但係佢隔離有個人，阻止左我咁做。

果個就係阿爸。

佢既出現.....令我卻步。

而同時，無數個問號係我腦中出現。

點解Anna會係度出現？

佢黎搵我？

點解佢會知我住係度？

點解阿爸會係度出現？

佢黎搵我？

點解佢會知我住係度？

佢地同時出現，會唔會係識既？

佢地點解會識？

不過我見到佢地之間無眼神交流或對話，好似陌路人咁，我暫時排除左佢地認識呢個可能性。

我去到升降機前，見到呢棟大廈唯一既升降機去到21層就停左，21樓，正正就係我住既樓層。

唔會兩個一齊搵我咁橋丫嘛？

我即刻上返屋企，門前無我預期既二人。

唔會入左去㗎嘛？

入到去，我見唔到阿爸或者Anna，到底發生咩事？



## 第二十四章-戀情(5)

帶住疑問，呢日就咁過左。

第二日係禮拜六，唔洗返學，我打算落街食早餐。

一打開門.....Anna! ?

見到Anna係對面屋開左門，我個腦突然一片空白。  
而佢都一樣，我地你眼望我眼，大家都呆左。

「Anna.....?」

我首先開口。

「Frog.....? 點解.....你會係度?」

「我.....打算落街食野.....你呢.....?」

「我都係.....一齊?」

我意思係你點解會住係我對面呀。

「好。」

食飯再問。

我地去左樓下一間茶記（對，又是茶記）。

「餐蛋麵呀唔該」

「火腿通呀唔該」

我地同時開口。

大家有啲尷尬。

「點解你會係我屋企對面既?」

我地再次同時開口，今次仲問埋同一條問題。

「我.....不嬲住係度。」

Anna答左我。

「我姨媽住呢度，阿媽死左我就搬左黎.....」

我都答左佢。

我突然醒起我應該要解釋果日既事。

「Anna.....果日呢.....我同Rummy唔係你諗咁架!」

「Rummy係我朋友，你偷食都偷遠啲丫嘛.....」

死！我一提佢就有少少嬲，個樣仲有少少想喊.....

「Rummy拿我黎激佢男友咋.....」

跟住我將成件事解釋清楚翻比Anna聽。

「信我啦.....我愛既只有你一個架咋！」

「我.....」

Anna聽完好似未消化到咁，目光亦唔知應該放響邊而四處遊走。

最後佢whatsapp Rummy問清楚，之後就原諒左我。

今次係真既。

我地呢棵小樹苗終於捱過呢次風波。

我地開開心心咁食呢餐早餐，感覺呢間茶記既野食比我以前樓下果間甜得多，係因為Anna係我隔離嗎？

## 第二十五章-甜蜜

食完餐早餐，我就同Anna一齊上翻去21樓。同落黎過陣唔同嘅係，我地係拖住手上去，當然部升降機嘅移動方向都唔同啦，上同落。

我地係各自嘅家門前，望住對方，Anna，多謝你，陪我渡過左之前難捱果段日子，後來誤會左我，宜家都信翻我，原來雨過，真係會天晴，我地宜家終於可以享受下陽光嘅沐浴啦。

我地放開拖住對方嘅雙手，各自歸家。

翻到去，門先啱啱關好，電話又傳來whatsapp。

「Frog~~」

「點呀Anna~~」

我學佢~~，宜家感覺良好，似翻對情侶。

「好掛住你XD」

「前幾秒咪見完囉XD」

「我無見你咁耐，一餐早餐時間點夠呀！」

「咁你想點呀:)」

「出黎啦比卡超！」

「??？」

「開門見我XD」

跟住我開左門，見到Anna都開左半趟門，探頭出黎。

「嘻，宜家見完啦，你可以退下啦~」

「咁快？但係我想見多陣啫！」

「唔比你見！」

佢淘氣地伸一伸舌頭，就關門，翻翻入屋。

whatsapp

「冇冇搞錯(´ ˘)你見我就得，我想見就唔得！」

「係咁架啦~~」

「嗚.....」

「唔好喊，姐姐請你食糖糖XD」

「n年前嘅對白你都仲記得？」

「記得呀！同你嘅回憶黎架嘛~」

好甜呀！

我一直以為只有舌頭嘅味蕾先感受得到甜味，原來心都得架！原來心都有味蕾架！

今日就同Anna whatsapp左成日，食晚飯果陣仲搞到比姨媽鬧，我都係第一次比人鬧得咁開心。

最後，我同Anna whatsapp到佢訓，我先放低部電話，好似個傻佬咁笑住訓。

## 第二十六章-又係佢

甜甜蜜蜜又過一日。

今日已經係冰釋前嫌後第七日，剛剛好一星期，連續七日有無限咁多糖分比我攝取，我都就黎有糖尿病。

係上個星期我地係各自家門前相遇對方嘅時間，我地好有共識咁一齊開門，然後當然係甜甜蜜蜜咁去茶記食早餐。

「火腿通呀唔該」

「餐蛋麵呀唔該」

我地同時開口。

不過今次係幫對方叫，上次嘅尷尬換成今次嘅甜蜜，我地相視而笑，再同時開口。

「你仲記得！」

然後大家又繼續笑，野食到左，大家交換黎食，通粉中間有條麵，火腿上面有隻蛋。

我再講我地有幾sweet我驚讀者打我，所以你地自己自行想象，反正係好甜好甜，我都唔知呢兩篇我講左幾多個「甜」字，有讀者得閒就幫我數啦。

星期一。

今日應承左Anna同佢食lunch，時間其實唔太充裕，我一打鐘就九秒九衝出去，去到佢學校，係塵世嘅mk女神偽女神腐女娘娘宅女中，我一眼就認出Anna果個天真可愛嘅笑容。

佢學校比較近我地屋企，我地去左老地方 - - 茶記食，呢度見證住我地感情大躍進果一刻（解釋清楚佢原諒我），我地都好鍾意黎呢度。

期間我又見到阿爸.....

佢坐左係近門口一張檯。

我又醒起果日佢出現係我屋企樓下.....之前掛住Anna，掛住解釋，都無左件事添.....一陣記得問Anna阿爸果日去左邊。

你問我點解唔宜家衝去問阿爸？

因為佢離遠一見到我就即刻埋單走左。

## 第二十七章-這不是導火線(1)

食緊飯。

「Anna」

「？」

「上次呢，你原諒既我前一日果個星期五，有個男人同你一齊，果個係邊個？」

「.....？男人.....？」

「應該同你一齊入升降機。」

「.....哦.....你應該講緊我老豆？」

「老豆.....？」

「係呀。果日老豆同我一齊返屋企。」

老豆？果個係我阿爸黎啲.....點解我阿爸會突然變左人地老豆？仲要係我條女嘅老豆？

帶住疑問，今日就咁過左，Anna好似察覺唔到，我對佢「老豆」既疑問，不過咁都不失為一件好事。

第二日，我提出去Anna屋企，好聽係「見家長」，實情係，見佢老豆。

我係屋企門口，內心波濤洶湧.....如果見到我阿爸.....如果阿爸係Anna老豆.....點算.....？

我戰戰兢兢咁入到去Anna屋企，佢屋企主色係橙色，比人一種清新既感覺，正係我暫時忘記左「阿爸同老豆」呢個又複雜又簡單又麻煩又奇怪又.....（下刪數萬形容詞）既哲學問題，欣賞緊Anna屋企嘅格局，佢就出現左係我眼前。

阿爸.....

野生的阿爸突然出現了！咳咳，我嘅意思係佢係其中一間房行出黎，佢望到我之後一臉愕然。

「阿爸.....！」

我唔小心叫左出黎.....

「喂，唔好亂叫我老豆做阿爸啲！」

好彩Anna無發現端倪。

「老豆~呢個係我男友，佢叫李榮軒。」

「軒.....軒仔.....你好.....」

「世伯你好」

我特登加重音係「世伯」二字度。

估唔到阿爸竟然係Anna老豆.....

到底發生咩事.....

係Anna臉前我扮到無野咁，反而阿爸表現唔太自在。

我遲啲的一定搵你問清楚！阿爸，我要你比個合理解釋我.....

## 第二十八章-這不是導火線(2)

翌日，我放左學之後，見到阿爸企係屋企樓下。

「仔，要唔要一齊食個飯？」

阿爸唔再係以前果個笑嘻嘻既阿爸，以往敦厚既臉上徒添左一份憔悴，同一份傷感，應該話，依家既佢，根本唔係我阿爸。

「世伯，我唔係你個仔，不過我唔介意同你食餐下午茶既。」  
我無辦法認佢做阿爸。

我地去左m記坐低。

「軒仔，阿爸對唔住你地兩母子，不過，可唔可以等我同你講個故仔.....？」  
「講啦.....」

佢深深吸一口氣，再慢慢呼出，然後開口，講呢個故事.....

「有一個男人，佢係傳統嘅乖乖仔，勤力讀書，甚至中學時期無拍過拖，大家都以為佢係個老實人，係個傳統好男人，邊個嫁著佢一定好幸福，個男人都以為自己會好專一，係佢二十歲果年，佢既初戀終於黎臨。」

「呢個女人叫阿麗，呢個男人好愛阿麗，男人二十二歲果年，佢地發生左關係，阿麗有左呢個男人既BB。」

「佢地無好似預期咁結左婚，因為阿麗爸爸覺得呢個男人未有足夠能力養起一頭家，阿麗爸爸比左個期限呢個男人，三年內要買到層樓。」

「呢個男人好努力好努力，一日打三份工咁儲錢，結果，用左兩年半，佢就買左一個500尺既單位。呢個時候，小朋友已經就黎兩歲。」

「根本無人估到，呢個老實人，呢個『好男人』，係兩年半間，識左個女人，佢叫Daisy，男人亦對佢產生左情愫，你話呢個男人仲中唔中意阿麗？我可以好肯定答你，佢愛既只有阿麗。」

「Daisy好似只係個過路人咁出現係呢個男人既生命中，佢地係曾經發生過關係，不過Daisy知道呢個男人好愛好愛阿麗，所以佢選擇左自動退出。」

## 第二十九章-這不是導火線(3)

「Daisy好似只係個過路人咁出現係呢個男人既生命中，佢地係曾經發生過關係，不過Daisy知道呢個男人好愛好愛阿麗，所以佢選擇左自動退出。好似無出現過咁，呢個男人，呢個負心漢，就咁無左件事，繼續佢既幸福快樂既生活，以為可以同阿麗開開心心咁生活落去。」

「可惜事與願違，童話既結局並無發生係佢地身上.....  
佢地後來再生多左個仔，叫軒仔。而同時，Daisy一個人養住同呢個男人既骨肉，不過呢個男人唔知道。後來Daisy嫁左個老公，再生多左個女。」

「2003年，沙士.....」  
佢停頓左一陣，再繼續。

「死左好多人，包括呢個男人既大仔，同Daisy老公，Daisy一個人照顧兩個細路都毫無怨言。」

「一個月前，Daisy佢終於頂唔順，捱病左自己，兩個細路就交左俾婆婆照顧，不過老人家，照顧兩個細路都幾辛苦，Daisy唔忍心見到婆婆咁辛苦，終於鼓起勇氣，打俾呢個男人，想佢幫手照顧兩個細路。」

「男人知道自己原來做左個不負責任既男人咁多年，覺得好對唔住Daisy，終於，選擇左去照顧Daisy同兩個細路，佢以為Daisy一個人照顧兩個細路咁多年都得，阿麗都可以，唔想畀老婆知道佢出面有個仔既事，作左個理由，一走了之，點知.....」

「點知阿媽就咁比你害死左！」  
聽到呢度，我已經大概知道成件事既來龍去脈，為左男人所謂既面子？阿媽就咁自殺左.....

「係.....呢個男人就係我.....阿麗就係你阿媽.....Daisy對子女就係Anna同佢阿哥.....對唔住.....我原本以為可以瞞你地一世.....」

「估唔到個天要你個仔同你個『女』拍拖！」

「對唔住.....」

我轉身離去，不帶走一片雲彩。

# 人物關係圖

複雜就不要看了，可能看完更混亂的～



## 第三十章-這不是導火線(4)

回家吧.....

如果遇上Anna要怎麼樣？

我唔知應該點面對佢.....

我假假地都係佢...阿哥？

唉.....

雖然異父異母.....

算了，先到處逛逛。

講起上黎，今日已經係六月一號。

你問我有咩特別？

Anna五號生日呀.....

不過我仲未考慮好，點處理同Anna既關係.....我到底仲可唔可能繼續同佢一齊？我可唔可以若無其事.....？

唔理啦，我都好耐無行街，就趁呢個機會行下街買下野啦。

旺角其實好多野行，我一時之間都唔知行邊先好，呢個時候，我見到陸仔，自己一個孤伶伶.....

「做咩自己一個咁dry呀？」

「唉.....咪提啦，比人放飛機呀！」

結果就變成我同陸仔2個行街（唔係拍拖），去邊佢話事，唔洗我諗。

到最後我地由花園街開始行，行到朗豪坊陸仔收到電話，放佢飛機果班人原來只係玩下佢，依家係旺角，跟住佢就神采飛揚，趕住去投胎咁走左，我就繼續行多陣。

最後我係街邊鋪買左隻狗狗公仔，打算送比Anna做生日禮物，佢之前話生日禮物想要小狗，雖然唔係同我講，我亦送唔起隻狗仔比佢，不過我諗佢會中意嘅，但其實我唔知我到底會唔會送。

翻到去屋企，我攤係床度，望住白茫茫嘅天花板，再次思考。

其實理性咁諗，我同Anna一齊係無問題既，最多咪當阿爸係「世伯」，反正我同Anna無血緣關係，又唔算亂倫。

不過呢家唔係數學計數啲.....Anna可以話間接有份害死阿媽，雖然佢唔知情，如果同佢一齊，可能日日都諗起阿媽，我個心都唔舒服啦.....加上要日日對住阿爸.....每次叫佢做「世伯」其實個心都好唔舒服，我真係得咩？我真係接受到同Anna一齊咩？

- - - - - 我是可愛的分隔線（才怪） - - - - -

某放假中的讀者，如欲觀看以下內容，請出文:)

## 第三十一章-這不是導火線(5)

繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？  
繼唔繼續同Anna係埋一齊呢？

.....

下刪無數句「繼唔繼續同Anna係埋一齊呢？」

呢個問題真係令人好煩惱呀！！

雖然我好想同Anna一齊.....但係我又唔想見到阿爸.....

如果只係咁，我應該都會揀Anna.....掛。

但係阿媽既死.....

而且雖然無血緣關係，但我都係Anna掛名阿哥.....

嗚啊！.....

其實.....實際上，我到底有幾鍾意Anna？

鍾意Anna，定愛佢？

我.....還是找別人問問意見吧.....？

陸仔嗎？反正佢就坐係我前面，剛好又午飯時間。

「陸仔！」

「青蛙仔？咩事？」

「今日同我食飯好無？」

「ok呀，康仔！豪哥！青蛙仔話一齊食.....」

「喂！我既意思係我同你兩個人！」

「下！？你唔係搞啲咁既野呀嘛？事先聲明呀，我性取向正常架！」

「Hi你，我性取向都好正常，你諗左去邊呀！」

「哦，咁得啦，食飯啦！其實我都有野想搵人問意見，問你就更好。」

「康仔豪哥無你地既事啦！」

## 第三十二章-這不是導火線(6)

我地一路行，都只係講去邊食野好果啲，吹下水，無人正題。

坐低食飯嘅時候終於到左，我亦準備開口。

「青蛙仔呀.....我呢之前呢中意左呢一個女仔啊.....我呢鍾意左佢呢好耐架啦.....咁呢我呢就決定左呢想追佢.....」

咦？唔係我搵佢傾計嘅咩，點解會變左佢講架？佢男人老九妞妞拎拎咁，做乜春呀？係啲.....佢好似話有野想問人意見，應該指呢樣啦.....

「下.....係呀.....？」

「我查過架啦，佢住係你對面屋，佢細我地一年，帶黑粗框眼鏡，矮矮地，你認唔認得呀？」認得.....咪Anna囉.....仲係我女友黎添.....

「認認...認得呀.....」

「你可唔可以幫我追佢呀？」

陸仔問呢句既時候無啦啦好激動.....睇黎佢真係好鍾意Anna啲.....

「你有無查佢有無男朋友呀.....？」

「下.....係啲.....頂，唔記得左查呢樣.....」

無視陸仔好似數學拿九十九分就係因為唔記得寫單位扣左分咁既樣，我開口問我想問既野。

「陸仔呀，我阿爸之前走左佬，阿媽因為咁自殺左，之後我發現原來阿爸去左照顧佢舊情人既子女，但係依家佢個『女』係我女朋友，你認為我應該點呀.....？」

「哇！你幾時識到女朋友架？」

「咪講廢話啦。」

「我認為你應該離開個女仔。」

「下！？點解呀？」

「你既情況你應該好明白，如果繼續同個女仔一齊就要對住你阿爸，但係你應該對你阿爸好反感先會煩惱應唔應該同個女仔一齊啦，既然你咁猶疑，其實你都唔係咁深愛個女仔姐，咁不如放手，唔好要自己難做啦。」

我合理雙眼思考陸仔既說話，最後我都有左我既決定。

「陸仔，我幫你追個女仔。」

「下！？但係如果佢有男朋友.....」

「佢有。」

「咁算啦，我無謂拆散人地啦.....」

「佢就係果個女仔。」

「下？邊個？」

「我掛名細妹。」

「.....下！？姐係佢係你女朋友？」

「係呀。」

「兄弟妻啲，算啦，有咩可能要你為左成全我地而犧牲自己.....」

「唔係你叫我離開佢既咩.....」

## 第三十三章-這不是導火線(7)

我將個狗狗公仔比左陸仔，就好似將Anna交左比佢咁。

你問我點解會捨得就咁唔要個女友？點會捨得呀，但係我接受唔到自己繼續同佢一齊既話，不如搵個更愛佢既比佢好過啦.....咁樣對大家都好，Anna可以有個愛佢既男友，陸仔可以追到佢想追既女仔，我.....唔洗面對阿爸，三贏呀.....

我叫左陸仔係Anna

5號生日果日比個驚喜佢，我會同Anna鬧交，叫佢乘虛而入，如果失敗，我就直接講分手，無論如何，Anna一定要幸福，同我一齊我根本比唔到幸福佢，陸仔愛佢多過我愛佢，好多.....

我好似無講點解陸仔會識Anna？咁大家聽多個愛情故事啦。（才不是要撐字數）

Anna同陸仔其實同一間小學，即係話Anna係陸仔小學師妹。陸仔係小學三年班(被迫)參加課外活動嘅時候識到Anna，果時開始，陸仔已經鍾意左二年級既Anna，但係毒向左走向右走性格，無同Anna做到朋友，一直暗戀Anna，暗戀到陸仔佢六年班。

終於陸仔鼓起勇氣，去左搵Anna，問佢打算讀邊間中學，Anna對於陸仔唐突既問題無多留心，答左佢，跟住陸仔真係入左Anna所講果間中學，所以先識到我，呢個係後話啦。

不過Anna無入到第一志願，佢地最終都係唔同校，陸仔都以為自己四年暗戀終於要告終，佢勸自己放低，佢以為自己放低左，但佢中二某日，係旺角見到Anna出現，心跳既感覺突然出現翻，佢先發現自己仲鍾意Anna，跟住就鍾意佢到依家，一直以黎做Anna既「守護天使」，默默伴在旁。

陸仔中二開始節日呀Anna生日呀乜野特別日子都好，都會以「小蘋果」呢個名送禮物比佢，寫卡祝福佢果啲，至於點解要叫小蘋果，佢唔肯同我講，nvm。

你話啦，我比到幸福Anna定陸仔比到？

我有咩資格霸住Anna？

我退出，對陸仔先公平.....

陸仔付出太多啦.....

## 終章

「鈴鈴鈴鈴 鈴鈴鈴鈴 鈴鈴鈴鈴 鈴鈴鈴鈴.....」

鬧鐘聲突然響起，陸仔呢？我唔係頭先先至俾左個公仔佢既咩？突然唔見左既？點解.....我個頭好痛.....點解會有鬧鐘聲.....

「起身呀！遲到啦！」

呢把係.....阿媽把聲？

我一覺醒來，發現原來這只是南柯一夢。

LOL friend list入面，無一個叫娘娘我愛你既人。

阿爸仲係外國overseas training。

Anna無出現過係我人生當中.....

「唉，好心你幾廿歲人就唔好咁多性幻想啦。」

我猶如聽到Anna嘲笑我既聲音。

- 全故完 -



講下笑，呢章可以當無睇過。



## 第三十四章-這不是導火線(8)

我仲有兩日時間，去享受Anna做我女朋友既時間同感覺，跟住就要放開一直拖住既手。

呢兩日，平日我地做既野，突然變得好特別，咁當然係因為我知道我將會係最後一次享用呢份甜，酸中帶苦既甜。

五月四號，我地去左果間茶記。

「你呢兩日怪怪地咁既.....」

「下.....有咩.....？」

「做咩成日望住我，以前唔覺你咁留意我架！」

「你靚呀嘛！」

我帶住微笑咁講，呢個微笑背後，收埋太多野，最後一日既不捨，見到你未來將會幸福既安慰，唔洗再面對阿爸既愉悅，一個難做我卻做左既決定。

「口花花！」

佢扮生氣，如果聽日你都嬲得落我就好啦.....記住要嬲我.....

「係啱，你知唔知聽日咩日子呀？」

佢突然用個好得意既樣望住我。

「聽日？六月五.....」

我皺起眉頭，扮作思考得好辛苦。

「我地相識一個月呀？」

「唔係呀！我地四月尾識架！」

「第一次見面紀念日？」

「唔係呀！我地五月十二號第一次見呀！」

佢好似又有啲嬲。

我望望表。

「哇！我今日有野做，夠鐘喇，唔陪你啦，唔好太掛住我！」

為左唔好令話題繼續落去，我都係要走，想望多陣都唔得.....

「喂喂！我聽日生日呀！！喂！」

呢個時候，我已經走遠，絕對可以扮聽唔到。

whatsapp又響起，我估係Anna同我講佢生日，我熄左電話，一路行，個心好痛。

決定左，就無得返轉頭，一切好快就可以完結，傷呢樣野.....比啲時間佢，自己就會結疤復原架啦...  
...時間會沖淡一切.....

我返左屋企。

又係訓係床度，望住個千年不變既天花板，哈哈.....到最後陪住我到最後，陪住我經歷咁多野既竟然得番天花板你.....真係諷刺.....

哈.....一滴淚就咁流左落黎。

我亦無心情去左抹左佢，眼淚在心裡流？錯囉，眼淚梗係眼到流架啦，心.....流既係血，好傷好傷。

不知不覺我好似訓著左。

## 第三十五章-這不是導火線(9)

擘大雙眼，今日已經係六月五號。

兩行淚痕猶在，好似提醒緊我呢一切唔係夢咁。

艱難咁起身，換好校服，返學。

一打開門，我大驚，就好似小學生抄功課一抬頭見到老師咁。我見到Anna企係我屋企門前，應該係等埋我一齊返學，佢生日.....所以期望我會比啲咩驚喜佢.....？對唔住，要令你失望啦.....

「哈囉！」

佢笑臉依然，反而心虛既我表現唔太自在。

因為我琴日稍微抱怨過嚮往多陣都唔得，天呀你宜家就畀個機會我？真係多謝曬啫.....

「嗨.....」

「做咩咁既樣既你？」

佢一邊嘻嘻笑一邊問，大概以為破壞左我打算俾佢既驚喜，所以滿足咁笑掛，對唔住，要令你失望啦.....

「無野，我地行啦.....」

我勉強擠出一副笑臉。

「嗯！」

佢仍然陰陰嘴笑緊，如果你係度期待緊啲咩，對唔住，要令你失望啦.....

唔同學校自然唔同路，好快我地就分別，分開果刻，我隱隱約約見到Anna雙眸有一絲失望。

話左架啦.....

翻到去學校，陸仔急不及待，問我今日既詳情。

「放學你去送隻公仔比佢，對白自己搞掂，其他我會搞.....」

「okok唔該曬你呀青蛙仔！真係好多謝你！」

算是做了件好事嗎.....？

咁橋有份功課要寫件好人好事，可以寫呢樣嗎？幫兄弟追自己女朋友。

算啦，唔好再諗啦.....（潛台詞：算9數啦你，夠薑你咪寫落好人好事囉7頭）

午飯時間，Anna突然出現係學校門前。

嚇死我，仲驚過海馬公園十月全城哈囉喂（入面既夏蕙bb）。

好彩我係窗見到，我即刻叫陸仔將作戰計劃推前。

我？食小食部囉，仲可以點？見多一次傷多一次呀.....

小食部唔少位置可以見到校門口情況，我坐左其中一個，我都唔想架.....但係無位.....

我見到Anna見到個公仔之後，又驚又喜。

驚，大概係因為陸仔竟然係「小蘋果」，仲送生日禮物比佢。（我叫左陸仔話比Anna知佢就係小蘋果）

喜，大概係份禮物佢真係好鍾意，呢個時候，我不禁苦笑起黎。

Anna收起左份禮物，即係隻狗狗公仔。

陸仔亦行番番黎，過黎同我食飯。

Anna仍然企起度，等緊人咁，我知道，果個係我。

我眼角好似濕濕地.....

## 第三十六章-這不是導火線(10)

放學，我即刻狗衝返屋企。

結果，都係係屋企樓下見到佢，要黎既始終都要黎嗎.....

「Anna.....」

「青蛙仔！」

佢個樣真係有少少黐同唔開心。

「點呀.....」

忍住，唔好喊.....男兒淚不輕彈呀.....邊有人飛人仲喊到七彩，未開口已經淚流滿臉架？

「你.....真係唔知道.....今日咩日子.....？」

我合理雙眼，吞一吞口水。

「你生日呀嘛.....我見到曬啦.....」

「你.....見到咩.....？」

佢好似好疑惑。

「今日lunch time，你同陸仔傾得幾開心呀，份禮物你好鍾意架！」

「.....我今日係黎搵你架.....」

Anna你唔好喊呀.....見到你喊我都唔知點.....

我都好想喊.....

「你收到份禮物之後有幾開心，我睇到曬啦。Rummy係你朋友，要偷食都偷遠啲丫嘛，唔係你講既咩，陸仔都係我朋友黎架，佢係我兄弟黎架.....」

開始眼濕濕.....

「唔係你諗咁架.....」

我唔要聽你解釋呀，我會喊架.....

「我唔要聽你解釋。」

我忍住淚水，轉身一迅間，鼻頭一酸。

「Frog！點解當初我信你，你就唔可以信下我呀！！」

我信呀.....

「因為你唔應該信我。」

嗯，其實我一早搵左Rummy，話我因為屋企問題，必須要離開Anna，叫佢幫我手，扮同我真係有路，有咩差池，都可以以呢個做理由，Anna，我要你徹徹底底憎恨我.....對大家都好。

「咩.....咩呀.....」  
佢有啲未接受到我講既野。

「Frog！！」  
我無拎轉頭。

入到升降機，我迅速狂按「close door」個制。  
不過Anna都係入到黎。

## 第三十七章-這不是導火線(11)

「點解要跟住入黎。」

我盡量冷淡，但真正原因係講太多我驚我會忍唔住再喊。

「因為我愛你，我會證明俾你睇。」

佢拎出果隻狗狗公仔。

眼神雖有不捨，但更多既係堅定，你到底有幾愛我呀？

佢.....一野整爛隻公仔。

媽呀，依家個個女仔都咁暴力架？

望住我精心揀既公仔，被Anna一手摧毀（其實係雙手），好似係個天提醒我唔好心軟咁。

「宜家你信啦.....我同佢無野架.....」

佢用一對水汪汪既眼睛望住我。

「算啦。」

佢以為我既意思係我唔再追究，露出一臉欣喜既笑容。

「我地以後都要相信對方.....唔好再唔信任對方啦.....」

佢拖起我既手，想挨個頭落我膊頭度。

但係我甩開佢隻手，再行開一步。

「你.....做咩呀.....」

Anna好難以置信既樣。

我別過頭，低聲講道。

「我話算啦，係指.....我地之間，算啦。」

經過幾秒既冷場，升降機亦停到21層，留低一臉茫然，仍然未接受到今日發生既事既Anna，翻返屋企，再次返返去對我不離不棄既床上面，望住對我不離不棄既天花板。

「天花板呀.....點解你可以做到對我不離不棄.....但係我就偏偏做唔到？」

忍左好耐既淚水，係天花板面前釋放，我放聲大哭。

對唔住Anna，祝你幸福。

隔壁既你，一定以為陸仔係我地感情破碎既導火線吧.....希望你唔好憎左佢啦.....如果唔係又要佢花心機追你，佢已經等左你八年啦.....

對唔住呀Anna，係你生日先咁對你.....嬲我啦.....

## 第三十八章-祝你幸福（到此為止）

Anna同陸仔最終都係埋一齊，佢地望落好幸福，真係好襯.....

一開始有時佢撞到我（住咁近，唔出奇），表現都好閃縮，但慢慢，佢開始同陸仔進入熱戀期，對住我，就好似只係個過路人咁。

「從不喜歡孤單一個 可惜偏偏孤獨一個 我不懂得跟我獨自對坐 原來沒有你 做人相當痛楚 你有否想起我 若是再遇 求讓我悔過 可不可再戀過.....」

最後，我都係自己一個，你同陸仔一齊的確幸福好多，我應該無行錯路.....

不過，真係好難受。原來沒有你，做人真的相當痛楚。

不經不覺，我都考完DSE啦，我以為呢段相識到分開大概一個月既戀情，好快可以沖淡，我好快可以放低，結果.....

我考得唔差，雖然入唔到三大，但都入到科大。

為左「慶祝」，姨媽話落街食晚飯，佢問我去邊，我決定，到最後我都係揀左茶記。

係呢度，食住由六月五號開始由甜變苦既食物，我無斥責呢度老闆 / 廚師，反正正好配合我心情。

一路食，一路喊。

「軒仔入到大學好感動呀？」

姨媽似係笑緊我，不過唔重要啦。

我係度，見到以前既我同Anna，之間既點點滴滴.....

「好好分開應要淡忘 你找到你伴侶

重臨舊情境 我卻哭得出眼淚

時常在聯想 你會溫馨的抱他午睡

然而自己現在沒任何權利 再抱怨一句

我再沒勇氣向你講舊時 沒有勇氣相愛另一次

為你將睡眠忘記 通宵傾談但已經頓成往事

還是記起 無道理的對罵是年紀小的不智

今天你能忘記 只得我懷念多麼諷刺」

「如何逃避這戀愛故事 仍然說得多細緻

重覆的震撼 餘震未停止

我再沒勇氣向你講舊時 沒有勇氣相愛另一次

為你將睡眠忘記 通宵傾談但已經頓成往事

還是記起 無道理的對罵是年紀小的不智

今天再回頭看 這一個女孩子

我怕面對你說到生活時 後悔過往的幼稚爭議



沒你的動人時節 喧譁歡騰亦已經並無意義  
閒話到此 遺憾到此 結論是回憶總要到此  
雖則你難忘記 這戀愛遺物終需棄置」

Anna · 祝你幸福 · ( 陸仔都係 )

> > 真·全故完 < <

# 外傳-對不起

大家好！我係Cedric，即係陸仔。

我同Anna係讀同一間小學既，即係話Anna係我小學師妹。我係小學三年班(被迫)參加課外活動嘅時候識到Anna，果時開始，我就鍾意左讀緊二年級既Anna，果陣覺得佢好nice，又好可愛，又pure又true，但係毒向左走向右走性格，無同Anna做到朋友，一直暗戀Anna，暗戀到我六年班。

我鼓起勇氣，去左搵Anna，問佢打算讀邊間中學，為左同佢繼續一間學校，我一定會好努力去考佢理想中學，Anna對於我呢個唐突既問題無多留心，答左我，跟住我好努力考呈分試，最後真係入左Anna所講果間中學。

不過Anna無入到第一志願，我地最終都係唔同校，我以為自己四年暗戀終於要告終，不斷勸自己放低，一段時間過左，我唔再成日諗住佢，我以為自己已經放低左，但係係中二某日，我竟然係旺角見到Anna既蹤影，心跳既感覺突然出現翻，之後又一直對佢念念不忘，我先發現自己仲鍾意Anna，跟住就一直鍾意佢到依家啦，一直以黎做Anna既「守護天使」，默默伴在旁。

我中二發現自己仲鍾意Anna開始，所有節日呀Anna生日呀乜野特別日子都好，都會以「小蘋果」呢個名送禮物比佢，同寫卡祝福佢，至於點解要叫小蘋果.....係因為.....我認識Anna果個興趣班，其實係寫詩，我第一首作品就係叫「小蘋果」.....入面寫緊既其實就係Anna，果首詩仲被人貼堂，不過Anna應該唔知我寫既係佢。

今年，坐我後面果個青蛙仔，屋企發生左少少事，所以搬左去Anna屋企對面住。

我係一個好自私好賤既人，我認我有異性無人性架，我真係好鍾意好愛Anna，為左佢我咩都做得出。

有日佢搵我傾計，食飯時間，我一路行一路吹水一路諗，佢想講咩.....？一定係關於佢呢排發生既事，如果係父母問題，佢就搵老師啦.....洗唔洗搵我？如果係咁.....應該係感情問題，例如.....佢女朋友？但係佢有女朋友架咩？

坐低之後，我比佢先開口，坦言我想佢幫我追Anna，佢無正面回答我，然後就同我講佢既野。

佢話佢阿爸之前走左佬，阿媽因為咁自殺左，之後發現原來佢阿爸去左照顧佢舊情人既子女，但係依家佢個『女』係佢女友。

我突然醒起，母親節我送禮物比Anna既時候，見到Anna同個男人一齊並行，宜家諗翻.....果個男人好似就係青蛙仔阿爸，好耐之前青蛙仔po過張相上FB，就有佢阿爸。

唔通.....佢女友就係Anna？唔怪得知頭先唔正面回答我啦.....

既然你問我意見.....你同Anna都唔係識左好耐姐.....我敢肯定我愛佢多過你愛佢，我把心一橫，教唆青蛙仔離開Anna，只有咁，我先可能乘虛而入。當然佢話到讓Anna比我果陣我無一口答應，講到好似好委屈佢咁，不過我熟識佢性格，咁樣唔單止唔會動搖到佢，反而可能令佢更加覺得應該讓Anna比我。

最後？因為青蛙仔既幫助，我成功令Anna成為我女朋友！不過其實當初佢都係愛住青蛙仔，雖然我唔知我有咩比唔上佢，我將佢同佢阿爸既事講左比Anna知，當然有加啲鹽加啲醋，講到青蛙仔同佢一齊好辛苦，等Anna唔再執意同青蛙仔一齊，最後，我用誠意打動到佢，我地成為左真真正正既情侶，佢望落亦慢慢放低青蛙仔。

我同佢就幸福快樂咁生活落去，好似童話般既結局。

考完DSE後，有一日，我經過Anna屋企樓下一間茶記，聽Anna講呢度有好多佢同青蛙仔既回憶，我見到青蛙仔係果度一路食一路喊，原來.....你竟然有咁愛Anna.....隔左咁耐都仲未放低佢.....遲黎既悔疚感一湧而上，對唔住呀青蛙仔.....

## 第三十九章 (這算是一章嗎?) -Happy Ending! ?

「算啦。」

佢以為我既意思係我唔再追究，露出一臉欣喜既笑容。

「我地以後都要相信對方.....唔好再唔信任對方啦.....」

佢拖起我既手，想挨個頭落我膊頭度。

係果一刻，我終於感受到Anna有幾愛我，我唔再執意離開佢，或者呢個先係最好既結局。

最後我同Anna就幸福快樂咁生活落去。

你睇下！happy ending呀！

唔好傻啦，我係唔會寫真happy ending架-w-

好似無人理過陸仔咁，雖然主角係Frog，不過如果咁陸仔太慘慘豬。

鍾意左八年同相愛一個月，真係一條難計算既數。

係呢個故入面，係無絕對既Happy ending架啦，如果我寫Frog同Anna一齊，唔通寫陸仔另外搵到佢既真愛？太T××啦.....

個人認為陸仔付出左咁多，畀番個happy ending佢都正常呀.....

雖然愛情唔係計邊個付出得多就得。

如果我遲少少心血來潮既話，可能或者會寫個Anna同Frog既完美結局，陸仔就.....forever alone一次啦，反正係另一個平行時空你係同Anna一齊（多數都唔會寫）。

最後，我發現寫《我係網上面識左個男仔》難寫過呢篇，唔知點解，所以果邊會更得比較慢，我會盡量堅持寫曬佢（其實無人睇）。

最後最後，其實我寫果陣加左好多笑位，唔知你地有冇笑呢？

最後最後最後，其實我只得好少人有睇呢個故，如果你有睇，多謝你。

最後最後最後最後，我只係想講.....今次真係最後啦，再見。

# 平行時空的我們

如果要用一個詞語去形容你嘅初戀，你會用咩字？

單純？

幼稚？

青春？

甜蜜？

定係遺憾？

好單純咁相愛，為對方幼稚嘅舉動開心，以為自己拍緊青春偶像劇，天真地相信住甜蜜會一生一世。

但係最後，都係分手收場。用自以為好嘅方式愛對方，落得兩敗俱傷嘅下場。幾多年後，先會發現自己嘅「為你好」，只為對方帶黎左傷害？

當睇得清當初嘅分開，只係源自自己嘅唔成熟，初戀，就成為左遺憾。如果俾個機會我翻翻去嗰陣，我只想同你講一句對唔住。然後，用盡全力挽回你。

挽回嗰個笑容無雜質嘅你，挽回嗰個曾經全心全意愛我嘅你。

就算係唔埋一齊，都想話你知我咁做嘅原因，想比你知我無唔信你，無唔愛你，起碼，起碼，令你傷心少啲。

「所以，你因為我老豆對唔住你阿媽，所以選擇對唔住我？」Anna雙眼通紅，唔敢相信兩人之間，竟然仲有一段咁狗血嘅關係。

「我」我一時語塞，面對Anna嘅指責，我無力反駁。其實成件事最無辜嘅人，就係Anna。

「你同你阿爸有咩分別？為左自己個心舒服啲，就肆意去傷害愛你地嘅人。」Anna好嬬。

但佢無鬧錯。

為左唔想見到阿爸，我自私咁決定放棄呢段感情，自以為是咁一走了之，彷彿當初嘅阿爸。我以為Anna會捱過去，會同陸仔好幸福，但我憑咩擅自幫佢做決定？當初阿爸咪又係以為阿媽會堅強。

「對唔住」我後悔，真係後悔。眼淚不自覺咁流落黎，抹極都有。但我真係放唔低心入面嘅恨。哪怕成為左同討厭嘅人同一種人。

「點解你唔一早同我講？」Anna亦泣不成聲。

「如果你真係信我，就應該相信有咩問題，我地可以一齊解決。」Anna抱住我，埋首繼續喊，一邊斷斷續續咁繼續講。

「錯嘅唔係你，亦唔係我。你真係介意，我可以唔要呢個老豆。」

我愕然，為左同我一齊，失而復得嘅父愛都可以唔要？Anna心入面，我係有幾重要？

「一個十幾年無出現過嘅人，你覺得我有幾需要？你覺得佢害死左伯母。我何嘗唔怨佢令我媽媽受左咁多年苦？」

「我一早唔係小朋友啦，唔會因為人地有爸爸而我無而傷心。只會因為媽媽一個人咁辛苦養大自己而心痛。」

「如果我知道，傷害一個家庭先得到一個老豆，你覺得我仲會心安理得咁接受？」

「你心入面，係咁諗我？」Anna抬頭直視我，眼入面滿是受傷。

「對唔住我唔係呢個意思我我地仲可唔可以係翻埋一齊？」

「嗯梗係要一齊！」Anna表情似哭似笑。

對唔住，為我做錯過嘅，為我傷害過嘅。我會用一生去對你好，去補償翻。

係呢個平行時空，陸仔先係放手嘅人。

陸仔望住相擁而泣嘅兩個人，望住自己買黎表白嘅花，默默地轉身。

「送比你。」隨手送比一個路人，陸仔忍住眼淚衝去無人嘅角落啜泣。

唔係自己嘅，終要放低，最後一次，喊多最後一次，我就放手。

「你無事咩？」拿著花的少女，遞上紙巾。